

## Paveizietė...

Basuom kuojiem dolkieto kelioko so karštuom smėltiem, tēp gerā kaitėnontiuom kuoju padus őr lėndontiuom i tarpopėrštius, kaima vākā liekdava maudītėis i negili upieli. Atgajos karšta dėina maudītėis, vuo grīždava nomėi, apėntās őkaitė kāp pečė őr, je paslinks, lieks apsėsokė atgal i upieli gaivintėis.

Ne be pavuoju bova keliuonė – vėinuo vėituo, pri paukština, ont kramiu ostaunė nosėleisdava paukština pasėdėdžiavėms, ės onksta jau pasėlėpės ont žiuogriu tvuoralės őr laukous, kumet vakā če pasėruodīs laliedamė őr šaukuodamė, ka galiptom ož čioprīnu papešiuotė őr so snapo pakauši paknapuotė.

Muosous liob ronkuom kāp viejė melnīčės, šaukuos, vuo ons nieka nebėjė! Sokriuokins liob patius stėpriausius ligi ašaru, kraujė lašos par spronda novarvies...

— Štiš, šepetuonė, štiš! — ratavuodava ciuocė paukštinkė, nobaididama gaidi őr pavadins liob apsėkriuokusius basakuojus padietė paveizietė, dies šėndėin vėštas kiaušius a nedies. Ne veltou, prėkraus liob būreliou vakū pėlnus skreitus kiaušiu... No vuo tėi, jau ašaras nosėbraukėi, linksmė, skous sau kelalio nomėi, kor, ėsšėtraukė mamas pėtelnė, kols i anou kiaušius ė žarins sava oždarbi sausā, be juokė tauka. Vuo tas būdava daug skaniau ož mamas pėitus!

Geruojė ciuocė paukštinkė kuožna dėina laukdava pri tvuoruos mažūju talkininku, biegotiu pri nedėdėlės vingelės besėraitontė opelė, laukdava őr gaidīs. Vākā, vuos akis prapliesė, dėdėlio dulkiu debesio pasėlėsdava maudītėis, paskou – eilies tvarka i paukštiau perma. Ta ėstuorėjė so gaidio kartuojies daugībė kārta, pakuol ėsšmuoka nebėbijuotė kelalė pru anou — žėnuojė, kad geruojė ciuocė nogins ėsšėplietusi kāp keriepla gaidi, katram patėka pešiuotė plaukus ės pakaušė.

Jau paskiau, ka vākā pauga, liob anėi teirautėis draugū:

— No, štėk, a žėnā, kas ir „paveizietė“?

Ne vėsė žėnuojė, ne vėsė žėna őr dabā, dėkuo anā kuožna karta reikiejė kaniečnė veizietė őr žėnuotė, kėik bus tū kiaušiu, tik patīs klausėnietuojė nikumet nesoprata, dėkuo ciuocė ėsš permas anu tėik liob lauks kuožna dėina būrie kolkuoza vėštu so dorno gaidio ont tvuoros. Ana vėsa laika bova vėina.

2016 m.